



*Selasa, 04 Mei 2021*

**Ogen: Jakup 5: 4**



**Begiken penderkuhna**



Lit upah tutus. Enda me si ate Jakup iturikenna arah oratenta senda enda. Upah tutus alokenna sipemena labo arah kalak si mereken dahin man bana, tapi ibas Dibata nari. Dibata ngergai kalak si ndahiken dahinna alu tutus. Ketutusen ienda lambang patuh dingen kiniteruken ukur. Si asilna pe mejile, ratur, la meros. Sebab Ia pe Dibata si erdahin alu tutus, ratur dingen mejile asilna, itepaNa doni ras isina seh kal ulina.

Emaka merawa Dibata kempak kalak si la ngergai temanna si enggo tutus erdahin, si la nginget mereken upah man temanna sapih manusia si enggo erdahin man bana. Kalak si bage megombang man sapih manusia. Jadi oratenta enda pe sekaligus ngerana kerna keadilan sapih manusia. Labo lit dalanna kalak bayak mapas man kalak si musil. Kalak bayak e ilebe-lebe manusia nge lebih tunggungna tapi ilebe-lebe Dibata seri nge kerina idahNa.

Kalak bayak si ngagahken kinibayakenna, erta-ertana tapi erbahan la adil nandangi kalak musil la ngena ate Tuhan. Emaka erkadiola me kalak bayak e dungna, sebab Dibata nge si jadi imbangna ibas perbahanenna si la bujur e. Kesenangen si ialokenna ibas doni enda ulihna erbahan la bujur labo jadi pasu-pasu ibas kegeluhenna, tapi mpersiapkan dirina guna ngaloken ukumen bas Dibata nari pagin.

Moria selaku nande dingen diberu si sipatna mediate, tentu peka ibas perkara-perkara kinilaadilen. Si pemena ibas jabu (konteks sindeherna), ula terjadi kinilaadilen nandangi anak-anak. Sibereken hakna adina nggo dalankenna kai si tugasken kita man bana, selaku nande ola ingkar janji entah pe nahani hak anak. Ngenalah ateta si mehuli, ngenalah ateta perkara-perkara si bujur. Terlebih kata si meherga enda enggo seh man banta, ola min seh pernembekh ate Dibata e man banta ibas kita ndalanken si la bujur.